



Sumáriu Kazu
Tribunál Distritál Oekusi
Setembru 2019

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 2*

Tipu kazu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	1
Artigu 225 KP	La halotuir obrigasaun alimentár	1
Totál		2

2. Totál desizaun ne'ebé JSMP monitoriza : 1

Tipu desizaun	Númeru
Pena prizaun (Artigu 66 KP)	-
Suspensaun ba prizaun nia ezekusaun (Artigu 68 KP)	-
Pena multa (Artigu 67 KP)	-
Pena admoestasaun (Artigu 82 KP)	-
Omologa	1
Totál	1

*Sumariu Kazu ne'e prodús ho númeru limitadu tanba tribunál ativa filafali nia atividade hanesan ba-bain iha 16 Setembru 2019 hafoin feriadu judisiáriu hahuu iha 01 Agostu to'o 15 Setembru 2019, no durante semana rua ikus fulan Setembru ne'e, aleinde JSMP tun Dili hodi partisipa iha atividade balun, Tribunál Distritál Oekusi rasik mós ladun marka oráriu hodi hala'o julgamentu tanba iha ligasaun ho prosesu rotasaun ba juis sira.

Aleinde ne'e, kazu sira ne'ebé JSMP observa iha Tribunál Distritál Baukau no Suai durante semana rua ikus iha fulan Setembru 2019, kazu sira ne'e sei iha prosesu kontinuasaun. Nune'e'e JSMP la produse Sumariu Kazu bá iha Tribunál rua ne'e.

3. Total kazu sira ne'ebé adia tuir JSMP monitorizasaun : 0

Razaun adiamentu	Númeru
Total	0

4. Total kazu sira ne'ebé kontinua prosesu tuir JSMP nia monitorizasaun : 1

B. Deskrisaun sumáriu julgamentu ba desizaun kazu sira

1. Krime la halotuir obrigasaun alimentár

Nú. Prosesu : 0003/19.PDOEC
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Jose Elu
Defeza : Dr. Calisto Tout
Desizaun : Omologa pedidu dezisténsia keixa

Iha 25 Setembru 2019, Tribunál Distritál Oekusi prezide julgamentu tentativa konsiliaun ba krime la halotuir obrigasaun alimentár ne'ebé envolve arguidu BO hasoru nia oan JSO (idade tinan 9), JAO (idade tinan 8), no ZO (idade tinan 5), iha Distritu Oekusi.

Akuzasaun Prokuradór

Prokuradór akuza katak iha 23 Jullu 2017, arguidu sai husi uma no husik hela nia oan sira ho nia feen iha uma no nunca fó apoiu alimentár ba nia oan sira to'o agora. Aktu ne'e prejudika tebetes nesesidade oan sira nian.

Prokuradór akuza arguidu kontra artigu 225 KP kona-ba la halotuir obrigasaun alimentár ho moldura penál to'o tinan 2 ka multa.

Produsaun ba prova sira

Bazeia ba artigu 262 Kódigu Prosesu Penál kona-ba tentativa konsiliaun ba kazu krime sira ho natureza semi-públiku, antes tama ba produsaun ba prova sira, juis husu atu halo tentativa konsiliaun ba arguidu ho nia oan sira ne'ebé representa husi oan sira nia inan.

Iha prosesu konsiliaun ne'e, arguidu rekoñese la fó alimentasaun ba sira nia oan na'in tolu dezde sai husi uma tanba arguidu hola ona feto ki'ik. Maibé arguidu promete katak ba oin arguidu sei fó alimentasaun ba nia oan sira. Lezada no lezadu sira ne'ebé representa husi sira nia inan konkorda ho arguidu nia promesa ne'e no husu ba tribunál atu dezisté tiha ninia-keixa hasoru arguidu.

Alegasaun final

Prokuradór konkorda ho akordu ne'ebé parte rua halo no husu ba representante menór (oan sira nia inan) atu hato'o fali keixa ba prokuradór liuhusi dalan sivíl kona-ba regulasaun poder paternál. Aleinde ne'e, defeza konkorda ho alegasaun prokuradór ne'e.

Desizaun

Bazeia ba pedidu dezisténsia husi lezada no lezadu sira ne'ebé representa husi sira nia inan no akordu dame hosi parte sira, tribunál konklui prosesu ne'e no omologa akordu dame entre parte sira no absolve arguidu husi aktu krime refere.

Atu hetan informasaun kompletu, favor kontaktu:

Casimiro dos Santos

Diretór Interinu JSMP

Diresaun e-mail: casimiro@jsmp.tl

Telefone: 3323883 | 77257466